

BOLETIN ECLESIASTICO

DEL

OBISPADO DE OSMA.

Se publica en dias indeterminados, en medio, uno ó mas pliegos. Cada tres de estos cuestan dos reales. Toda reclamacion se dirigirá: *Al Director del BOLETIN ECLESIASTICO del Obispado de Osma.*

VENERABILIBVS FRATRIBVS PATRIARCHIS, ARCHIEPISCOPIS,
EPISCOPIS ET LOCORVM ORDINARIIS VNIVERSIS CA-
THOLICI ORBIS GRATIAM ET COMMVNIONEM CVM
APOSTOLICA SEDE HABENTIBVS.

PIVS PP. IX.

VENERABILES FRATRES

SALVTEM ET APOSTOLICAM BENEDICTIONEM.

Sæpe, Venerabiles Fratres, in hoc diuturno Pontificatu ad Vos conversi significavimus Vobis, quam grato exceperimus animo argumenta devotionis illius et dilectionis, quas misericordiarum Deus indidit Vobis, ac fidelibus curæ vestræ creditis erga Nos et Apostolicam hanc Sedem. Et sane cum inimici Dei civilem eius ditio- nem invadere coeperunt, ut tandem, si fieri posset, prævalerent adversus Iesum Christum et Ecclesiam, *quæ est corpus Ipsius et plenitudo Eius*; Vos Venerabiles Fratres, et christianus populus, numquam Deum, *Cui venti et mare obediunt*, exorare desistis, ut procellam sedare vellet, nec unquam destitistis ab iterandis amoris vestri testimoniis, omnibusque adhibendis officiis, quibus Nos in tribulatione Nostra solari possetis. Postquam vero hac ipsa urbe totius orbis catholici capite privati fuimus, et eorum arbitrio com- missi, qui Nos oppresserant, Vos una cum plerisque e Dicecesium



vestrarum fidelibus ingeminastis preces, crebrisque denunciatio-
 nibus asseruistis sacrosanta religionis et iustitiæ iura, quæ in-
 credibili proculcantur ausu. Nunc autem, cum novo post S. Petrum
 eventu, et in Romanorum Pontificum serie prorsus inusitato, sextum
 et vicesimum attigimus annum Apostolici Nostri ministerii in Ro-
 mana Cathedra, indicia edidistis adeo illustria gaudii vestri ob-
 insigne hoc beneficium tenuitati Nostræ largitum, et adeo perspi-
 cue demonstrastis florentissimam vitam, qua ubique informatur chris-
 tiana familia, ut profunde commoti fuerimus; vota que Nostra vestris
 iungentes, novas inde vires duxerimus ad plenum absolutumque
 triumphum Ecclesiæ fidentius expectandum. Contigit autem No-
 bis acceptissimum, creberrima ubique affluxisse supplicantium ag-
 mina ad sanctiora templa, eaque in toto terrarum orbe confertis-
 sima redundasse fidelium frequentia, qui una cum proprio Pastore,
 per publicas preces et sacramentorum usum Deo gratias age-
 bant de beneficio Nobis collato, et instanter ab ipso Ecclesiæ
 victoriam postulabant. Moerorem autem, curasque Nostras non
 levare modo, sed et in gaudium converti sensimus a litterarum
 vestrarum gratulationibus, obsequiis, votis, a creberrimo fidelium
 undique confluentium adventu, quos inter plurimi eminebant
 nobilitate generis, aut dignitatibus ecclesiasticis vel civilibus
 præstantes, sed fide nobiliores. quique omnes affectu et opere
 iuncti plerisque ex istius urbis et occupatarum provinciarum
 civibus, huc a dissitis etiam regionibus convolarunt, iisdemque se
 obicere voluerunt periculis et contumeliis, quibus Nos sumus obno-
 xii, ut coram testarentur religiosos suos, suorumque concivium
 erga Nos sensus, Nobisque volumina afferrent, quibus plurima
 centena millia fidelium ex omni gente, proprio adscripto nomine,
 Nostri principatus invasionem acerrime configebant, eiusque res-
 titutionem a religione, iustitia, ipsaque civilitate flagitatam et
 præceptam graviter exostulabant. Hac vero occasione stips quo-
 que Nobis solito largior affluxit, qua pauperes simul ac divites
 occurrere conati sunt factæ Nobis inopiæ, cui accessere munera
 multiplicia, varia, nobilissima, splendidumque christianarum artium
 et ingeniorum tributum relevandæ præsertim accommodatum du-

plici Nobis a Deo concessæ potestati spirituali ac regiæ; et præterea copiosa splendidaque supellex sacrarum vestium et utensilium, qua squalori et egestati tot Ecclesiarum undique occurrere possemus. Mirum certe spectaculum unitatis catholicæ, quod evidenter ostendit, Ecclesiam universam, licet toto diffusam orbe, gentibusque compactam disparibus moribus, ingenio, studiis, uno informari Dei spiritu; et eo prodigiosius ab ipso confortari, quo furiosius illam insectatur et urget impietas, et quo callidius omni ipsam humano auxilio destituere conatur. Effusæ igitur et maximæ Ei gratiæ habeantur, qui dum ita dat gloriam nomini suo, per præsentem ipsam virtutis opisque suæ demonstrationem afflictas erigit mentes ad spem indubii triumphii. Verum si bonorum omnium datori hæc referimus accepta; gratissimo simul animi sensu afficimur in eos, qui se instrumenta præbentes divinæ providentiæ, Nos omni cumularunt auxilii, solatii, obsequii, devotionis, amoris officio. Sublatis autem ad cælum oculis ac manibus, quidquid huiusmodi impensum est Nobis a filiis Nostris in nomine Domini Ei efferimus, enixe poscentes, ut communibus eorum votis pro huius Sanctæ Sedis libertate, pro Ecclesiæ victoria, pro mundi tranquillitate citius obsecundet, et liberaliter unicuique in cælestibus ac terrestribus illam referat gratiam, quam Nos referre nequimus. Significare profecto peculiariter optaremus universis et singulis gratum animum Nostrum, Nostramque testari propensissimam voluntatem; at uberrima ipsa copia officiorum re, scripto, verbis undique oblata id fieri plane non patitur. Ut igitur quod cupimus aliquo modo assequamur, Vos, Venerabiles Fratres, quibus primas sensuum horumce Nostrorum partes deferimus, rogamus, ut eos Clero populoque vestro diserte nuncietis ac aperiatis. Hortamini autem omnes, ut constanter vobiscum in oratione perseverent animo plane fidenti; nam si oratio iusti assidua penetrat nubes nec discedit, donec Altissimus aspiciat, et Christus promisit, adfuturum se duobus in nomine suo coniunctis et consentientibus, Patremque cælestem facturum quidquid ipsi petierint; multo magis profecto Ecclesia universa iugi et unanimi orationes sua assequetur, ut demum, divina propitiata iustitia, con-

tritas videat infernas vires, profligatos ac deletos humanæ malitiæ conatus, pacemque et iustitiam reductas in terram. Vos autem quod spectat, Venerabiles Fratres, in hoc præsertim animum intendite et vires, ut arctius semper inter Vos coniuncti confertam veluti phalangem obiiciatis Dei hostibus, qui Ecclesiam, nulla unquam vi destruendam, novis adhuc artibus et impetu agrediuntur; quo facilius et efficacius eorum incursui resistere et eorum agmina fundere possitis. Hæc quæ vehementissime desideramus et enixe petimus, Vobis, totique catholicæ familiæ toto corde adprecamur; atque interim auspiciem optatissimi eventus, divinique favoris Apostolicam Benedictionem, indubiam præcipuæ benevolentiae Nostræ, gratique animi testem, unicuique vestrum, Venerabiles Fratres, Cleroque et populo toti siugulorum curæ commisso ex imo pectore depromptam peramanter impertimus.

Datum Romæ apud S. Petrum die V. Augusti festo Mariæ S. in Exquiliis anno Domini MDCCCLXXI.

Pontificatus Nostri Anno Vicesimosexto.

PIUS PP. IX.

PIUS PP. IX.

AD PERPETUAM REI MEMORIAM

QUI Ecclesiæ suæ numquam se defuturum spondit Christus Dominus, quum maxime in rem suæ immaculatæ Sponsæ esse perspexerit, insignes excitat pietate et doctrina Viros qui, *repleti spiritu intelligentiæ, tamquam imbres mittant eloquia sapientiæ suæ*. Neque enim sine providentissimo Omnipotentis Dei consilio factam est, ut, quum Jansenistarum doctrina Novatorum oculos in se converteret, errorisque specie multos alliceret, ageretque transversos, tunc potissimum extaret ALPHONSUS MARIA DE LIGORIO, Congregationis a Sanctissimo Redemptore Institutor, et Sactæ Agathæ Gothorum Episcopus, qui *bonum certans certamen, os aperiret suum in medio Ecclesiæ*; scriptisque doctis et laboriosis, istam ab inferis excitatam pestem radicitus evellendam, et ab agro Dominico exterminandam curaret. Neque vero has solum

sibi partes depoposcit Alphonsus; sed in Dei gloriam, spiritualemque hominum salutem unice intendens animum, plurimos Libros conscripsit, sacra eruditione et pietate refertos, sive, inter implexas Theologorum tum laxiores, tum rigidiores sententias, ad tutam muniendam viam, per quam Christifidelium animarum Moderatores inoffenso pede incedere possent; sive ad Klerum informandum, instituendum; sive ad Catholicæ Fidei veritatem confirmandam, et contra cujuscumque generis aut nominis Hæreticos defendendam; sive ad asserenda hujus Apostolicæ Sedis jura; sive ad Fidelium animos ad pietatem excitandos. Hoc porro prædicari verissime potest, nullum esse vel nostrorum temporum errorem, qui, maxima saltem ex parte non sit ab Alphonso refutatus. Quid quod ea, quæ, tum de Immaculata Sanctæ Dei Genitricis Conceptione, tum de Romani Pontificis ex Cathedra docentis Infallibilitate, plaudente christiano populo, et frequentissimo universi catholici orbis Antistitum consensu approbante, a Nobis sancita sunt, in Alphonsi Operibus reperiuntur et nitidissime exposita, et validissimis argumentis demonstrata?

Quamobrem in Hunc perbelle cadit nobilissimum illud divinæ Sapientiæ præconium: *Non recedet memoria Ejus, et nomen Ejus requiretur a generatione in generationem. Sapientiam Ejus enarrabunt gentes, et laudes Ejus enuntiabit Ecclesia.* Ac Pius VII. Prædecessor Noster recolendæ memoriæ, summam Alphonsi sapientiam demiratus, gravissimum hoc de eo protulit testimonium: *Voce, nimirum, ac scriptis in media sæculi nocte errantibus viam justitiæ ostendisse, per quam possent de potestate tenebrarum in Dei lumen ac regnum transire.* Item fel. rec. Decessor noster Gregorius XVI. *incredibilem Alphonsi dicendi vim, copiam, varietatemque doctrinæ* maximis laudibus, prosecutus, Eum Sanctorum Cœlitum fastis adscripsit. Tandem nostris hisce temporibus, pluri mi Sanctæ Romanæ Ecclesiæ Cardinales, fere omnes totius orbis Sacrorum Antistites, Supremi religiosorum Ordinum Moderatores, insignia Sodalium Theologorum corpora, illustria Canonicorum Collegia, et docti ex omni cœtu Viri supplices Nobis preces porrexerunt, ut Sanctum Alphonsum Mariam de Ligorio DOCTORIS

ECCLESIAE titulo honoribusque augeamus. Nos itaque piis hisce precibus obsecundare lubenti animo volentes, gravissimum hoc negotium, ut moris est, Congregationi VV. FF. NN. S. R. E. Cardinalium tuendis Ecclesiae Ritibus praepositorum expendendum commisimus. Jam vero, cum dicta VV. FF. NN. Congregatio in Ordinariis Comitibus ad Vaticanas Aedes die XI. Martii hujus verentis anni habitis, audita relatione Venerabilis Fratris Nostri Constantini S. R. E. Cardinalis Patrizi nuncupati, Episcopi Ostien. et Veliternen., ejusdem Congregationis Praefecti, Causaeque Ponentis; consideratis Animadversionibus dilecti Filii Petri Minetti Presbyteri Fidei Promotoris; item Patroni Causae Responsis, nec non Theologorum pro veritate sententiis; omnibus denique rationum momentis sedulo attenteque perpensis, unanimi consensu rescribendum censuerit: *Consulendum Sanctissimo pro concessione, seu declaratione et extensione ad universam Ecclesiam tituli Doctoris in honorem Sancti Alhonsi Mariae de Ligorio, cum Officio et Missa jam concessis; addito Credo, Antiphona ad Magnificat in utrisque Vesperis: O Doctor, ac Lectionibus I. Nocturni: Sapientiam, et VIII. Responsorio: In medio Ecclesiae;—Nos Rescriptum istud, edito die XXIII, ejusdem mensis et anni, Generali Urbis et Orbis Decreto, approbandum. confirmandumque existimavimus.*

At enim dilectus Filius Nicolaus Mauron, Superior Generalis et Rector Major Congregationis Sanctissimi Redemptoris ad jam memoratam Cardinalium Congregationem tuendis Ecclesiae Ritibus supplex adiit, ut in Festo ejusdem Sancti Alphonsi, per Decretum de quo habita ante mentio est, inter Ecclesiae Doctores adsciti, in Martyrologio Romano, post verba: *Sanctorum fastis adscripsit*, sequentia adderentur: *et Pius IX. Pontifex Maximus, ex Sacrorum Rituum Congregationis consulto, universalis Ecclesiae Doctorem declaravit;* item in VI. Lectione, post verbum: *accensuit*, haec alia: *tandem Pius IX. Pontifex Maximus, ex Sacrorum Rituum Congregationis consulto, universalis Ecclesiae Doctorem declaravit;* utque concessionem omnes hac super re factae, Apostolicis Nostris Literis confirmarentur. Quae quidem Cardinalium Congregatio cum in conventu, die XXII. mensis Aprilis hujus anni de more habito

rescripserit: *Pro gratia*; Nos die XXVII. mensis ejusdem, Rescriptum illud ratum habuimus, atque Apostolicas Literas in forma Brevis expediri mandavimus. Quæ cum ita sint, memorati dilecti Filii Nicolai Mauron obsequuti votis deque consilio VV. FF. NN. Sanctæ Romanæ Ecclesiæ Cardinalium Congregationis legitimis Ritibus cognoscendis, Autoritate Nostra Apostolica, tenore præsentium, titulum DOCTORIS in honorem Sancti Alphonsi Mariæ de Ligorio, Congregationis a Sanctissimo Redemptore Institutoris et Sanctæ Agathæ Gotorum Episcopi, confirmamus. seu, quatenus opus sit, denuo Ei tribuimus, impertimus; ita quidem ut in Universali Catholica Ecclesia semper Is Doctor habeatur, atque in die festo anniversario tum a regulari, tum a Sæculari Klero celebrando, Officium et Missa fiat juxta Sacræ Rituum Congregationis Decretum Rescriptumque, quod memoravimus. Præterea hujus Doctoris Libros, Commentaria, Opuscula, Opera denique omnia, ut aliorum Ecclesiæ Doctorum, non modo privatim, sed publice in Gymnasiis, Academiis, Scholis, Collegiis, Lectionibus, Disputationibus, Interpretationibus, Concionibus, Sermonibus, omnibusque aliis Ecclesiasticis studiis, christianisque exercitationibus, citari, proferri, atque, cum res postulaverit, adhiberi volumus et decernimus.

Tandem ut Christifidelium pietas ad hujus Doctoris diem festum rite colendum, ejusque opem pie implorandam magis accendatur, de Omnipotentis Dei misericordia, ac BB. Petri et Pauli Apostolorum ejus auctoritate confisi, omnibus et singulis utriusque sexus Christifidelibus, qui die festo ejusdem Doctoris, aut uno ex septem diebus continuis immediate subsequentibus, uniuscujusque Christifidelis arbitrio sibi deligendo, vere pœnitentes et sacramentali confessione præmissa, Sanctissimam Eucharistiam sumpserint, et quamlibet, ex Ecclesiis Congregationis Sanctissimi Redemptoris devote visitaverint, ibique pro Christianorum Principum concordia, hæresum extirpatione, ac Sanctæ Matris Ecclesiæ exaltatione pias ad Deum preces effuderint, quo die prædictorum id egerint, Plenariam omnium peccatorum suorum Indulgentiam et remissionem, quæ etiam animabus Christifidelium, quæ Deo in charitate conjunctæ ab hac

luce migraverint, per modum suffragii aplicari poterit, misericorditer in Domino in perpetuum concedimus.

Quocirca universis VV. FF. Patriarchis, Primatibus, Archiepiscopis, Episcopis et Dilectis Filiis aliarum Ecclesiarum Prælati per universum terrarum Orbem constitutis per præsentis mandamus, ut quæ superius sancita sunt, in suis Provinciis, Civitatibus, Ecclesiis et Diœcesibus sollemniter publicari, et ab omnibus personis Ecclesiasticis sæcularibus et quorumvis Ordinum Regularibus, ubique locorum et gentium inviolabiliter et perpetuo observari procurent. Hæc præcipimus atque mandamus, non obstantibus Apostolicis, ac in Universalibus, Provincialibusque et synodalibus Conciliis editis, generalibus vel specialibus Constitutionibus et Ordinacionibus, cœterisque contrariis quibuscumque. Volumus autem, ut præsentium Litterarum transumptis seu exemplis etiam impressis, manu alicujus Notarii publici subscriptis, et sigillo personæ in ecclesiastica dignitate constitutæ munitis, eadem prorsus fides adhibeatur, quæ adhiberetur ipsis præsentibus si forent exhibitæ vel ostensæ.

Datum Romæ, apud S. Petrum sub annulo Piscatoris, die VII. Julii MDCCCLXXI. Pontificatus Nostri anno vigesimo sexto.

Loco † Annuli Piscatoris.

Pro Dño Card. PARACCIANI CLARELLI,

Felix Profili, Substitutus.

OBISPADO DE OSMA.

Cumpliendo con el grato encargo que Nos hace Nuestro Santísimo Padre el Papa Pio IX en la Carta-enciclica del 5 de Agosto último, damos en su augusto nombre las mas afectuosas gracias á todos, y cada uno de los eclesiasticos y seglares de Nuestra Diócesis que con oraciones, limosnas ó de cualquier otro modo han llevado el consuelo al afligido corazon del Sumo Pontífice, el cual da á todos, como prenda de su gratitud, la Bendiccion Apostólica.

Con esta ocasion no podemos menos de recomendar eficazmente á todos Nuestros Diocesanos que insistan en sus fervo-

rosas oraciones y en la practica de todo género de obras buenas pidiendo á Dios conceda á su Santa Iglesia la libertad y tranquilidad de que necesita para hacer la felicidad de los pueblos, y dé al augusto anciano que felizmente la rige el sosiego é independencia de que injustamente se le ha privado, y largos años de vida para continuar gobernando á la grey cristiana con el tino y acierto con que hasta el presente la ha gobernado.

Y para que esta Nuestra Circular llegue á noticia de todos Nuestros amados diocesanos, será leida al ofertorio de la Misa conventual y parroquial de todas las iglesias del Obispado en el primer dia festivo que ocurra despues de recibida.

Peñalba de Castro, en santa visita pastoral, 6 de Setiembre de 1871.

Pedro Maria, OBISPO DE OSMA,

SECRETARÍA DE CÁMARA Y GOBIERNO.

Desde esta fecha hasta el dia 30 del corriente mes se hallará abierta en la Secretaría de estudios del Seminario Conciliar del Obispado, la matrícula para todos los que deseen cursar en el mismo. En los dias del 27 al 30 seran examinados los que no probaron curso en los ordinarios últimos, y tambien los que se presenten por primera vez á cursar en este Seminario.

Los alumnos que procedan de otros Seminarios acompañarán á la certificacion de cursos ganados, la de su buena conducta, dada por el Rector del Establecimiento en que hubiesen hecho sus estudios.

Los que pretendan para internos, presentarán al efecto en esta Secretaría una solicitud dirigida al Illmo. Prelado.

Los estudios tendran lugar en la misma forma que se verificaron en el curso próximo anterior.

Burgo de Osma 15 de Setiembre de 1871=*Salvador Martin pro-Secretario.*

ANUNCIOS.

LOS FRANCMASONES, por Mgr. Segur, traducido del francés por el marqués de Romana.—Precio 2 reales en Victoria y 2 y 1/2 fuera.

NOVÍSIMA APARICION
DE LA
SANTÍSIMA VÍRGEN EN FRANCIA.

RELACION DETALLADA

de este maravilloso acontecimiento, publicada con la autorizacion del prelado de la Diócesis el Sr. Obispo de Laval, y acompañada de una pastoral de dicho prelado referente al suceso, y de un estudio comparativo de las tres últimas apariciones de la Saleta, Lourdes y Pontmain

DOCUMENTOS TRADUCIDOS Y PUBLICADOS

POR D. JOSÉ M. LEON Y DOMINGUEZ,

Presbítero, Catedrático del Seminario de Cádiz.

Este opúsculo de 16 páginas en 4.º se remite franco de porte, enviando un sello de medio real á D. José M.^a Leon y Dominguez, Pro, calle de S. Juan n.º 40. Cádiz—En los pedidos hechos al por mayor, por libreros ó personas piadosas que quieran propagar ó repartir gratis este opúsculo, se hará la siguiente rebaja: 25 ejemplares, 10 rs.—50 ejemplares, 19 rs.—100 ejemplares, 35 rs.—200 ejemplares, 64 rs.—500 ejemplares, 92 rs.—Para obtener esta rebaja hay que dirigirse al mismo Sr. Leon, en Cádiz. Al pedido debe acompañar su importe en libranzas ó sellos. No se concede descuentos por comisiones ni giros.

PIO NONO

Y

LA ITALIA DE UN DIA

POR

ELEXCMO. E ILLMO. SR. OBISPO DE LA HABANA.

Un tomo De 356 páginas en 4.º—Véndese á 10 reales en Victoria, imprenta de Sanz y Gomez, Estacion 6.—En Madrid librerías de Clamendi, calle la Paz, núm. 6, y de Tejado, Calle del Arenal, núm. 20.

Los señores que hicieren pedidos por correos, remitirán 2 reales más por razon de franqueo.

BURGO DE OSMA: IMPRENTA Y LIBRERIA DE LA VIUDA DE MARTIALAY